

EAJ-EA KOALIZIOA. EAJ eta EAren arteko negoziazioek porrot egin ostean, akordioa erdietsi ez izanaren ardura elkarri egotzi zioten atzo bi alderdiek. Negoziatioetan jarritako baldintzen inguruan iritzi kontrajarriak helarazi zituzten.

EAJk eta EAK elkarri leporatu diote akordiorik lortu ez izanaren ardura

Bakoitzak proposatu dituen ordezkaritza datuen inguruko ika-mika sortu da bi alderdion artean

Eduñe Begiristain | GASTEIZ

Datozen udal eta foru hauteskundeetarako koalizio akordiorik lortu ez izanaren ardura elkarri leporatu zioten atzo EAJk eta EAK. Herenegun bi alderdien arteko negoziatioak eten ondotik, negoziatio mahaian jarritako baldintzen inguruko azalpen kontrajarriak helarazi zituzten EAJko eta EAKo ordezkariak, eta koalizio akordioa erabat baztertuta dagoela argi utzi zuten.

EAKo Antolakuntza idazkari Rafa Larreinak EAJri leporatu zion, haien irizpideak kontuan hartuz gero, EAK alkatetzaren %90 eta zinegotzien %30 galduko lituzkeela. Hain justu ere, Larreinak kritikatu zuen EAJren proposamenarekin, EAK Gipuzkoako zerrenda buruei eta alkatetzei, Hego Euskal Herri osoko hainbat zinegotziri eta Bizkaiko eta Gipuzkoako Batzar Nagusietako ordezkariari uko egin beharko liekeela.

Baldintza horiekin, gaur egun akordiorik erdiesteko aukerarik ez dagoela azaldu zuen Larreinak. Izan ere, Eusko Alkartasunak bere proiektu politikoa eta ordezkaritza defendatzeko «betebeharra» duela iritzi zion. Ildo horretan, azaldu zuen negoziatioan EAK 1999ko udal



XOUSA SIMAL

EAJko Josune Ariztondo eta EAKo Gorka Knörr, 2001. urtean eskainitako prentsaurreko batean.

hauteskundeetarako irizpidea defenditu duela, eta EAJk, berriz, 2000. urteko hauteskundeetakoa. Irizpide hori ez dela «logikoa» azaldu zuen Larreinak.

Alabaina, Xabier Arzalluzen alderdiarekin koalizio akordioa lortzeko prest egon direla berretsi zuen EAKo ordezkariak, betiere «indar subiranisten esku zeuden udalak indartzeko,

PP eta PSE-EE buru direnak berreskuratzeko edo bizikidetzarako arazoak dauden tokietan agintzeko».

Bestalde, EAKo presidente Begoña Erraztiren aburuz,

«onartezinak» izan dira EAJk negoziatio mahaian jarritako baldintzak, «EARI ordezkaritza ukatzen zitzaiolako». Erraztiren esanetan, negoziatioak hautsi izanaren arrazoia ez da EAK alkate edo zinegotzi gehiago nahi izatea, «EAJk duela bi urteko hauteskundeetan emaitzak irizpide gisa hartu izana baizik».

«Zenbakiak kontrakoa diote», kritikatu du EAJk

Jose Antonio Rubalkabak eta Juan Mari Juaristi EAJko legebiltzarkideek ukatu egin zituzten EAK emandako argudioak eta datuak. Azaldukoaren arabera, jeltzaleek proposatutako baldintzekin «EAK, orain duen ordezkaritza mantentzeaz gainera, gehiago lortzeko aukera ere izango luke».

Gauzak hala, Larreinak emandako informazioa gezurtatu zuten EAJko ordezkariak eta «zenbakiak justu kontrakoa» diotela iritzi zioten. Rubalkabak jakinarazi zuenez, «jeltzaleen koalizio irizpideei jarraituz gero, EAK gaur egun Hego Euskal Herrian dituen 29 alkatetzatik 27 mantenduko lituzke». Horretaz gain, EARI «sei udalerritan zerrenda buru izateko aukera» eskaintzen diotela eta horietako bostetan

KOALIZIORAKO BALDINTZAK

EAJ-REN BERTSIOA

EAK 29 udaletatik 27ri eutsiko lieke

EAK gaur egun Hego Euskal Herri osoan dituen 29 alkatetzetatik 27ri eustea proposatu zion EAJk Begoña Erraztiren alderdiari, jeltzaleek prentsa ohar baten bidez azaldu zuten.

Halaber, orain EAK Gipuzkoan dituen 11 udalerrietako alkatetzatik bitan (Legazpin eta Zumarragan) zerrenda burua aldatzea eta EAJren esku uztea proposatu zuten jeltzaleek. Horretaz gainera, beste bost udalerritan alkatez erdiesteko aukera eskaintzen zion EARI, Astigarraga, Eskoriatza, Hernani,

Villabona, Ibarra eta Segura, hain justu.

EAJren arabera, 1999an Gipuzkoako 56 udaletan koalizioan joatea proposatu zuen EAJk, eta 16etan joatea, aldiz, EAK. Bizkaian, EAK egun dituen lau alkatetzak mantenduko lituzkeela dio EAJk. EAK 13 udaletan joan nahi du koalizioan, eta EAJk, berriz, hogeita hamarretan. Araban EAK egun dituen bost alkatetzei eutsiko lieke: Asparrena, Dulantzi, Agurain, Okondo eta Amurrio. Herrialde horretan, EAK 11 udaletan koalizioan aurkeztea proposatu zuela diote jeltzaleek, eta EAJk hogeita bitan. Nafarroan, berriz, EAK koalizioa 9 udaletan proposatzen du, eta alderdi jeltzaleak 41etan.

EA-REN BERTSIOA

1999ko emaitzen errespetua

EAJk emandako datuei erantzun zien atzo EAKo Antolakuntza idazkari Rafa Larreinak, ohar baten bidez. EAK 1999ko hauteskundeetako emaitzak errespetatzea eskatu zuela, eta koalizioa lor zitekeen lekuetan «jarrera irekia» mantendu zutela esan zuen. EAren arabera, Bizkaiko Batzar Nagusietako eta Bizkaiko 11 udaletako ordezkariari uko egitea eskatu zion EAJk. Halaber, Gipuzkoako Batzar Nagusietako ordezkariaren %22ri uko egitea eta Foru Aldundiko presidentzia galtzea proposatu

zietela kritikatu du Larreinak. Gisa berean salatu du Donostiako zerrendetako buruak eta Tolosa bezalako udalerrigarantzitsuetako hautagaiak baztertzea eskatu zietela.

Arabari dagokionez, EAren alkatez errespetatzen ziren arren, Erraztiren alderdiak Arabako Errioxako hainbat herrietan (Oionen, Bastidan eta Guardian) eta Kanpezun eta Arraia-Maeztun ordezkaritza guztia galtzea proposatu zion EAJk. Modu horretan, EAK Arabako ordezkariaren %10 galduko lukeela kritikatu du Larreinak. Nafarroan, berriz, «errealitatea eraldatzea» egotzi dio EAJri. Izan ere, EAJk eta EAK hautagairik aurkeztu ez duten herriak direla jakinarazi du Larreinak.